

...neununnneunsisch

Vor e paar Daach hawwe merr sesommeGesetze, de Schorsch, de Karl unn isch unn sinn widder vumm Hinkelsche uffs Giggelsche kumme.

Seet de Karl: Wissder, mir allminonner sinn joo jetz e bissi älter, awwer dess dut nix droo ännern, dass isch gern noch e paar Jahr mettmache deet. Weil dess oone odder onnern deet isch gern noch erlewe.

Moont de Schorsch: Mir giehts genau su, awwer no ja, merr waaßes halt nitt. Awwer du host Recht, Karl, su e bissi was deet isch aach gern noch erlewe. Ess dut sich vill uff de Welt, unn allsfort iss e ebbes Neues debei. Was moonsden du, Honnes?

Isch saach: Ess iss wirklich su vill, was aach isch noch gern sehe deet. Awwer isch deet aach gern noch sellwer seh, dass sich ebbes ännerd, iwwer dess isch mich heitze-daach monschmol amüsiern unn monschmol ärjern due unn iwwer dess unser Enkel sich kabuttliche.

Doo frächt de Karl: Iwwer was dusden du dich amüsiern odder ärjern unn iwwer was dun unser Enkel sich kabuttliche?,

Isch habb gegrinsd: Ei iwwer die Neununnneunsisch. Die werrn sich ausschidde vor Lache, was mir fern Bleedsinn gemacht hawwe.

De Karl hott gefroochd: Unn was mache merr fern Bleedsinn?

Unn de Schorsch druff: Unn iwwer was ferr Neununnneunsisch?

Ich saach: Ei iwwer die Preise. De erst emol werrn die Enkel uns ferr bleed halle, weil merr iwwer e long Zeit su enn Quatsch mettgemachd hawwe mett dene neununnneunsisch omm End von jedem Preis. Die moone, mir hädde nitt gemerkt, dass drei Euro neununnneunsisch vier Euro sinn unn dass Fuffzeh Euro neununnneunsisch sechzeh Euro sinn. Awwer omm meisde werrn se driwwer lache, dass onn de Tonkstell die Preise su idiotisch warn mett saach isch emol Oonszwaunnferrzischneun ferr enn Liter Sprit. Die denke doch, wie bleed misse die Alde gewese soi, dass nitt gemerkt hawwe, dass dess Oonsfuffsisch sinn. Dess wär suwiesu e Sach ferr die Gerichte.

Ei wieso donn?, frächt de Schorsch.

Isch habb noch mieh gegrinst. Merr misst emol meddem Messbecher ...

Du moonst su ooner aus Blech, mett su Zahle innedroi?, frächt de Karl.

Genau su ooner, saach isch. Mir missde mett su oom onn e Tonkstell fahrn unn genau oon Liter Sprit enoifille losse unn donn frooche, was hawwen merr ze bezahle? Unn wenn der Tonkwart saache dut: Ei wieso?, donn deede merr saache, ei Oonszwaunnferrzischneun, also 1,429. Unn wanner seet, dess gieht nitt, isch muss Ihne Oonsdreiunnferrzisch abnumme, donn saache merr, mir hawwe awwer genau oon Liter in dem Messbecher unn nitt mieh, also numme Se uns 142,9 Eurocent ab, wie Se dess mache, dess misse Se de Herr Shell odder de Herr Aral frooche, mir jedenfalls bezahle koo 143 Cent, unn wonn Se dess nitt mache, donn schalte merr unsern Anwalt oi, weil mir losse uns nitt verarsche..

O ja, rieht de Karl, dess mache merr gleich moie, isch bin jetz schunn uff dem Tonkwart soi Gesicht gesponnd.

De Schorsch druff: Mir kennde aach dem Tonkwart saache, er soll gleich soine Chefs enn Verbesserungsvorschlaach mache, weil dess enn Haufe Materialkossde in gons Deitschlond sinn, statt 1,43 ständisch 1,429 ze schreiw, mett ooner Ziffer wenischer uff jeder Rechnung deede im Jahr 100.000 Euro Druckertinte unn Toner gespart werrn.

Doo lacht de Karl: Unn newebai deede se nitt die Leit verarsche. Eiern Honnes